

# Da gronda impurtanza per las regiuns muntagnardas

L'Associaziun svizra per las regiuns da muntogna (SAB) cumbatta l'iniziativa «No-Billag»

■ **(mc) Gist per las regiuns muntagnardas èn medias variontas ed independentas da gronda muntada. Damai che l'iniziativa «No-Billag» periclitass seriusamain l'existenza da la SRG/SSR e da la gronda part dals 34 emetturs regiunals da radio e televisiun vegn l'iniziativa cumbattida vementamain da l'Associaziun svizra per las regiuns da muntogna (SAB).** Tenor la SAB na pudessan ils blers dals 34 emetturs privats da radio e televisiun betg pli exister e stuessan sistir lur manaschi cun la fin da 2018. Gist ils emetturs che sa chattan en regiuns muntagnardas èn dependents existenzialmain dals retgavs da las taxas da recepziun. En las regiuns da muntogna na pudess la sperdita da talas taxas betg vegnir cumpensada cun entradas da reclama. Ils service public regional che vegn garantì oz da 34 emetturs crudass davent. Quests emetturs rapportan davart dals eveniments societars, politics, culturals e sportivs en las regiuns pertutgadas ed èn uschia in'impurtanta funtauna d'infur-

maziun tant per indigens sco per ils turists. Quest servetsch è era sa cumprovà en situaziuns da crisa sco auas grondas, bovas e lavinas. Ils emetturs regiunals enconuschan las relaziuns al lieu e pon infurmar permanentamain ed a moda objectiva.

## Aboliziun da la SRG/SSR

Sche l'iniziativa vegn acceptada sto la SRG/SSR vegnir abolida. Tenor la SAB fiss questa aboliziun radicala da cumparegljar cun in «grounding» da l'anteriura Swissair. La SSR haja oz in clera incumbensa naziunala da procurar per il service public. Ella rapporta davart ils eveniments en tut las regiuns linguisticas. Ella rapporta davart events da sport sco cuorsas da skis e festas da lutgaders. Ella rapporta dentant era davart la vita culturala en las regiuns sco per exempel cun emissiuns live da la festa da gioldaders. Ella porscha als artists indigens ina plattafurma da sa preschentar. Ella intermediescha cuntegns instructivs e porta infurmaziuns approfondidas da

davos las culissas, sco per exempel emissiuns da documentaziun a l'ocasiun da l'avertura dal nov tunnel da basa al Gottard. Betg d'emblidar las prestaziuns da la SRG/SSR en favur da personas cun impediments. Vegn l'iniziativa «No-Billag» acceptada crudass era quest servetsch.

Insumma na pudess in'interpresa orientada purmain al profit betg garantir in service public integral. Quai è era la raschun pertge che quasi tut ils pajais europeics disponan dad in'incumbensa da service public e d'in sistem da taxas.

## «No-Billag» fa donn a l'economia

Tar l'approvaziun da l'iniziativa svanissan en Svizra tut en tut radund 13 500 posts da lavur. En ils chantuns muntagnards Grischun e Vallais fissan quai mintgamai radund 250 posts da lavur. En il Tessin fissan quai mo tar RSI 1 155 personas che perdessan lur piazza. Las interpresas da medias fructifitgeschan plinavant cun lur incaricas l'economia locala. Per las interpresas èn quellas pli-

navant ina funtauna d'infurmaziun davart las activitads en las regiuns. Trais quartas da las interpresas na pajan naginas taxas da recepziun. Quai concerna cunzunt manaschis pitschens e mediochers cun ina svieuta annuala da main che 500 000 francs. En las regiuns muntagnardas datti cunzunt tals manaschis pitschens.

## Nagin «plan B» realistic

L'Associaziun svizra da masterants ha preschentà al cumenzament da l'onn in «plan B» per il cas che l'iniziativa vegniss acceptada. Quest «plan B» è dentant tenor la SAB absolutamain «nuncredibel». Uschia pretenda l'uniun artisanala che las prestaziuns da la SRG/SSR possian vegnir finanziadas en l'avegnir entras subvenziuns federalas e chantunales e cun dapli entradas da reclama e sur puschidas da Pay-TV. Che gist l'associaziun da masterants che pretenda cun mintga chaschun ina reducziun da taglias e taxas s'engascha tuttenina per novas subvenziuns n'è – tenor la SAB – in-

summa betg credibel. Dal rest hajan ils chantuns nagina cumpetenzza sin il sector da medias e quai vegnia er a restar uschia era sunter l'approvaziun da l'iniziativa. En regiuns muntagnardas èsi plinavant nunpussavel da generar novas entradas da reclama. E cun abunar puschidas da Pay-TV daventassan las expensas per consum da medias la finala in bun tant pli autas che las taxas actualas. Tar UCP Cablecom custa ina colliaziun da basa radund 800 francs. Per il chanal da sport vegnissan vidlunder anc ulteriurs 300 francs. Cun 1100 francs fiss questa puschida da spartas limitada gia uss trais giadas pli chara che las taxas da recepziun actualas da la SRG. Las vairas unfrendas tar l'approvaziun da l'iniziativa fissan pia la finala las consumentas ed ils consumers. «Els avessan a disposiziun ina tscherna pli pitschna d'infurmaziuns objectivas e stuessan pajar in buntant dapli che fin qua per sport e divertiment sur Pay-TV», constatescha l'Associaziun svizra per las regiuns muntagnardas (SAB) concludend.